

四庫全書

集部

欽定四庫全書

集部

江湖後集卷八

詳校官庶吉士_臣朱理

助教_臣常循覆勘

謄錄貢生_臣湯逢泰

謄錄監生_臣龍舜耕

欽定四庫全書

江湖後集卷七

宋陳起撰

趙汝績

汝績字庶可浚儀人有山臺吟藁

別曹松山

柳條能幾長袖手不忍折東風惡作劇客袂吹欲裂男
兒數寸管平世三尺鐵何問無鄒裾有國駐孔轍鷹鷂
擊飄風不受錦韝絀驂駟踏飛電寧顧黃金埒中年易

悲傷浩歎彌激烈常恐兒曹覺況與我輩別侏儒囊粟
飽壯士唾壺闕子行亦何以問口尚存舌但惜新相知
未是古決絕長安萬花春蘆鞭裊晴雪一第宜恩子相
期抱貞節

無罪言

哀哀民何辜遭此凶歟厄初聞數米炊次復併日食草
根掘欲盡木皮屑不給疲老就枯僵少壯作捐瘠千百
存什一烏喙仍菜色朝憂夕恐懼不得見新麥城市逐

未徒奔走困貴糴剥牀遂及膚近半死於疫吾皇素仁
惠一念軫饑溺發粟通有無寬逋已徵索郡縣之宣化
鞭扑庭下赤貪官猴而冠健吏虎而翼天災偶參會人
意莫致詰淮楚困烽塵荆蜀斃鋒鏑湘潭煩調戍洪贛
事供億昔聞惟內地可以稱樂國豈料一年饑狼狽如
此極公卿飽輿臺王侯羅第宅私財足苞苴公帑罄符
籍匪難活民命何以壽國脉子牟心徒勞之武壯自惜
安得扣九闕主階面咫尺天地本至仁君臣願一德賢

人斯在位能者各效職太守務循良監司去姑息智則
謀朝野勇則衛疆場自然風雨時自然稼穡植自然至
穌生自然元氣實何憂乎驩兜何畏乎強敵勿罪狂斐
言斯言定金石

環碧園錢信守趙蘭皋分韻得燕字

開窓俯平湖折柳舉離宴五馬遲未發暗雨雜飛霰江
東古名州廣信今近甸兵驕費紀律民瘠易咨怨硤田
歲少登孔道楮常賤正須儒者事毋媿循吏傳休辭一

杯酒往副千里願有語不敢留低頭媿檣燕

墨歌

空山老桐勁如鐵英枝翦翦夜撐月霜風著子涵玉膏
烈手崇朝剖融結別令刻木環清泉翠缸紙罽籠輕烟
霏霏玄霧掃難聚斷犀烹煉凝蛟涎和成萬杵擣圭璧
良工欲售常自惜絕憐剡水多天藤又慮端溪欠奇石
久知此藝人罕精作者未必識者明九華山下祝公子
頗以膠法成其名相逢但問詩有幾以詩換墨兩自喜

酴醾園館已謝春楊柳池塘正藏水薰風拂拂吹硯波
呼兒教作病手磨須臾滿硯片雲黑無詩可寫如君何

陳老畫牛

老融弄髮逃於禪曾藏丘壑身林泉時拈寸草幻墨汁
慘淡咫尺生風烟尤工畫牛古絕比不特形似真神全
平生知己一攻媿惜墨如命詩猶傳至今鄞人懷片紙
如護圭璧珠璣然陳生少壯曾入室妙處已覺墻及肩
岸痕樹影彷彿地雲陰雨氣冥濛天寒禽立背渡淺水

野葑沒足行淤田礪角思鬪力居尾倚木揩痒勢擁前
或沿草徑逐羣去或傍茅簷抱犢眠如何盡得此態度
前身想住桃林邊世人貴耳不貴目嗚呼此畫空爾妍
我方求之不論錢卷收更閱三十年欲尋此老不可得
摩挲陳迹方爭憐

題黃存之春莊雨急圖

山濃樹密春欲浮農夫有事營西疇鵲鳩聲歇風雨急
田塍滑遶如翻油牢披蓑衣緊繫笠渾身水流兩股慄

揀時浸種開稻包心急鞭牛牛步急前年春寒再移秧
去年夏旱赤地荒東隣西保幾人在渠今尚得本身強
低頭無言心似苦定願五風十日雨禾頭粒粒飽秋露
糠粃充腸米田主我家鏡湖烟水湄身雖不耕眼見之
何人得此畎畝趣短紙寫出無聲詩坐令展卷三太息
力穡莫供浮末食君看此輩終歲勤返向溝中作捐瘠

憶昔一首

憶昔三十氣拂雲鉞神轟鬼泣禡文欲提河洛數千里

重收圖版歸明君只今萬事付孤憤坐看江西竹生粉
苧絲成更剪釣衣一櫂賀湖烟水遠

游石窓

玉妃箋天收雪權東皇領春行人褰恍如身在五雲表
游到海上神仙山翠鳳婀娜竹夾道蒼龍偃蹇松當闕
壽藤絡崖半青白文薜繡徑全攔斑亭臺隱映樹石罅
樓觀突兀烟霄間遙峯前後獻奇峭流水左右供潺湲
珍禽倏來不可致瑤草已種何容刪目光貪翫忽炫焜

足力亦倦難躋攀日斜路轉歸意迫忽見洞府臨銀灣
洞中仙官笑呼客光風霽月冰雪顏云是四明石窓主
新自五老峯頭還猿留鶴戀不覺久碧落有詔行催班
却愁曳履踐台斗三十六峯花木閒

離越

東關寒水深遊子別家心櫂急波鳴枕蓬疎月在衾半
生多道路何日定山林隔岸聞漁唱離騷不敢吟

峽江龍祠

坐占山凹抱平看水怒流丹青今古像香火往來舟石
插青沙岸雲橫夕照樓揚靈相恐動巫覡有深謀

檜房

老檜倚虛房能生九夏涼讀書參句讀臨字識偏傍婢
織蒲為履童燒术當香興來吟不就頻與月商量

溪翁惠秋蘭

不夢靈均久西風為返魂頗忘千載遠但喜一香存勁
葉牽湘色踈花洗露痕勿嫌盆盎小能貯雪霜根

漁父

換米活妻子餘錢付酒家
身前舟似葉世上事如麻
獨
鼃過深浦伴鷗眠
淺沙旁人問醒醉鼓枻入蘆花

出郊

難得晴如許春游第一番
鳥啼花底樹雲裏面前山
馬
躍平沙地帆投落日村
戲呼漁子問吾與汝誰閑

和牡丹韻

園工巧栽接樹樹品新奇
富覺春無厭貧疑地有私
色

須綃幄護名記玉牌垂若說能傾日墻根有晚葵

道中登嶺

慚愧輕輿寄僕肩蛇蟠小徑入層巔升高但覺少平地
視下方知在半天尺隴寸田皆石級堵墻椽屋即人烟
客程到此更風雪聞一禽聲恐杜鵑

雁山章君以江山無盡圖求詩

寫此何人雲夢胃色塵真幻等成空看君一軸盡圖上
在我半生行記中剡水回舟乘夜雪楚江燃燭聽秋風

轉蓬蹤跡徒勞耳
心媿鴈山頭白翁

送蔡廉父赴贛辟

同游兩見菊花時
忍對西風話別離
官遠人應觀所主
心平事必得其宜
急流進進常思退
公事惺惺要帶癡
執手羞為兒女語
此言或可當箴規

西山影淡水無聲
知道扁舟破曉行
我欲夢魂隨去櫂
君應望眼斷高城
紅蓮綠水官中事
白酒黃花客裏程
從此鬱孤臺上月
十分知為故人明

南坡

小園路口安柴戶日日山翁手自開禽有色聲皆可玩
花無香實不須栽柳根著石宜安釣巖罅通泉可泛盃
更向南坡臨水處參差純種百株梅

將歸

挂笏西山一笑中掛帆猶及棟花風此身可是屠羊說
餘事寧非失馬翁不問鬢毛成早白免將癡面發羞紅
故人新寄虔州布歸製吟袍管釣蓬

送荷渚歸越

湘湖尊線正宜羹一舸濤江汎曉晴屋破不妨從客借
田荒自欲課奴耕不隨不激真吾事乍佞乍賢皆世情
從此一麾江海去西風斷鴈冷無聲

送荷渚兄自永嘉歸越

荷渚盟鷗冷不飛此番可與報歸期結廬雖小尚堪隱
負郭縱荒何慮饑吟得四靈無避處鑄成一錯在來時
吾家浸碧幸無恙草夢何須必謝池

容鬢蕭疎漸禿翁歸來恍與鶴仙同山川米老畫圖上
風月放翁詩句中隣園有蔬羹釜滿私田無秫酒樽空
欲尋上竈雲門路湖水不多船未通

林壑閒步二絕

懶不看書不賦詩樹陰濃處坐移時世間此等清閑福
問著漁樵却不知

參差臺榭碧雲中柳北松南一徑通帶得蒼桺無敵手
與僧不語立薰風

漁父

魚滿簦簑酒滿壺
鷗汀鶴伴清孤此
身漂泊雖無定
能與人間作畫圖

迎慶避暑

古寺無風地亦涼
人家難得此修廊
老僧貪說葛藤話
不覺山童上晚香

東陳宗之

略約東風客袖寒
賣花聲裏立闌干
有錢不肯沽春酒

旋買唐詩對雨看

姚江道中

漉酒蒸糕餽歲時
紛紛兒女換新衣
隣翁七十看鵝鴨
日暮破船撐未歸

謝高左歲惠墨竹

幅牋幻墨起秋風
便與蘭亭景致同
料得揮毫盤礴際
渭川千畝在胷中

韓仲蘇墨竹

墨暈生冰硯影寒素毫幻出碧琅玕尋常夜月窓前見
此度秋風紙上看

送竹軒歸越

東風隔岸繫歸航怕送君行重憶鄉為探山臺牆下柳
新來添得幾絲黃

趙汝回

汝回字幾道浚儀人太宗八世孫嘉定七年
進士至管進奏院有東閣吟藁

簡陸少監

登瀛彼何人選海渺無際巨矣萬斛舟不與貧士濟起
檣開錦帆逆浪使風勢貧士望洋立惆恍發深喟少監
笠澤英清芬襲蘭砌不經覓舉難不道覓舉易每恨里
選衰高才守低位趨榮靡願辱不富焉有貴一塗總不
歧隻臂韝羣鷙園桃各春妍崖松以霜悴端笏玉宸前
極口陳國是上之及公卿下之言守帥剥膚到饑毗孰
與護元氣凝陰積層霄剽賊延內地毋謂民不神民情

即天意善惡無弊絃良工先利器所願招雋豪棄取委
公義庶幾臯伊出扶傾掃沉翳從來立仗馬唯作噉莠
計堂堂不諱朝鳴鳳峙鵷陛

游列真觀劉道士拉上潮際觀漁

珠宮何岌巍前江後層嶂開山者何人蕭梁山中相竊
惟經營初豈曰此幽賞地靈宜仙事境寂銷俗相既積
惜水功帝命使瀛丈手泥燒丹竈歲久化黃壤石突古
殿出礪循陰廊響道人如修靜我豈陶官長偶結清淨

綠下榻稅塵鞅夜報前溪漁命酒將鱸享撐蓬待月來
架檠乘潮上秋高氣淒澹清極思超敞甃廢一夕眠庶
蒙列真獎

寄昭武馮司戶

朝解白鵲袍夕投武陽壘武陽衆盜區風傳駭妻子六
月日癸亥一書滿三紙具言五月初獨宿鍾石邸脅從
在所矜渠魁固無幾仰憑天子威肅導使君指豁達生
路開擲劍秉耒耜始如浮釜魚終如慕羶螳游騎從何

來使我顏有泚幸逃食其烹猶存漢家體黃巾與綠林
往昔殊僭擬陸梁能幾時寸戮而已矣理國若理身慮
我不慮彼潰癰復何難實恐元氣毀江閩五十邑荆棘
五千里我農失種穫我士乏儲峙捕招兩悠悠分明養
彪兕頃予參此軍忽忽逾一紀素飡歌伐檀居前愧揚
批坊間儼在目煨燼空遺址使君君子儒規摹用詩禮
軍勢李晟孤國事賈生恥蛟龍無波濤胡能制蛇虺誰
謂曹掾卑偉矣天下事生平報國軀小節安足死南北

又瓜分須君混文軌

送盧五方春分教端州

柳南矯矯蛟龍騫古詩古文高入天奉試詞場三十年
柳度夜夜魁星躔集英殿下聽臚傳唱在第十衆所寬
天豈恨汝月蝕篇罰使獨吟瘴海邊中州近年栽木綿
春寒秋熱氣已偏我心憂國身甚便編排失手安足言
敵窺淮漢蹂兩川君相不得高枕眠古人度嶺悲南遷
今人度嶺如登仙端溪溪澗山無烟長腰米白鯽鮠鮮

山媼採蕉蠶採蠟羽檄不警徭賦蠲黨碑諸賢昔往還
人士盡識洛水源廣文下馬春風前升堂講書鼓齎齎
遠方朋來笈在肩再拜願預弟子負中庸大學玄又玄
商盤周誥非雕鐫燈花兩簷陳俎籩一一口說手註篇
霜毫之筆雲濤賤墨香瓦滑不受研下巖古坑石柿填
千夫秉炬入庠泉鑊出一片紫玉軌色如馬肝鵲眼圓
得之酬直不論錢乍是對客寒無纔

翠閨行錢宋廷材分教大寧

蜀道不難兮君無聽李白之狂歌石棧梯雲入翠閭峽
船滸水通銀河棧平峽穩行人多灩澦堆前落錦帆諸
生郊謁冠峨峨秋堂晨鼓講義出亭夫樵豎知丘軻官
冷莫思歸去來且可淡飯閑吟哦君不見江西嶠南賊
未滅仕者蚤夜防弓戈

玉溪謠

雍灘束水水箭急逆水上灘灘壁立折篙斷纜船不前
乘船人懼梢人泣柳風搖春花雨晴飛帆忽過如飛星

仙人坐機織錦鯨邀我為賦銀河清茫茫天路高無陞
予止坎兮曷為至閑將身事問仙人仙人笑指灘船是
長風引船水沒灘天地變化須臾間不生凌清遡紫骨
何用費火燒還丹五百童男東入海水弱山遙無藥採
千層萬級通天臺方士致神神不來君不見桃花滿山
不知處劉阮逕入天台去

期平叔兄不至

兄昔別我遊衡麓我亦東吟石橋瀑八年能接幾函書

弟今白頭兄何如
河水流漸雪風惡
梧桐渡口孤舟泊
山房夜坐兄不來
蠟梅花折燈花落

贈劉道士

竹嶠鳥啼雲影閑
此是玉帝藏書山
他峯葉盡一霜後
仙洞春如三月間
白鬚道人年八十
指予滌路從溪入
靱著芒鞋不杖藜
嘯泉歸去衣裳濕

送張敬甫常薄出守荆門

前年匹馬辭軍幕
今年千騎從天落
座主門生合虎符

棠陰夾路春如昨身名貴驟俗所羨使君夷然心澹泊
父書盈篋本孫吳師燈一點傳伊洛莽莽叢榛亂草中
孤松昂昂立冰壑自古十二取世官換得青袍髮幾鶴
曾因窮達悟乘除以寵為危不為樂荆門形勢衿喉地
新城突兀壕未鑿天子憂邊復愛民鑿壕還恐妨犂穫
謂君夙抱文武資須君小試綏懷畧予聞衛國如衛身
癰疽甚毒腸胃薄堂堂人物守邊州國中羣盜令誰縛

薛景石瓜廬

湖村有真逸愛着釣魚袍
鶴語柴門靜身閑筆硯勞移
來瓜種別看得桂叢高所寫雖云僻文名不可逃

除夕泛靈溪

拜敕管桃源其如骨未仙
年荒醉者少官小野人憐
腸雪梅花在溪春草夢圓新
正有忙事未訪洞霄泉

和荷渚寄同遊韻

知幾百事懶夢只在山林一
馬塵中出千峯頂上吟月
新松逕黑柝靜斗城深相憶
梅花下花寒瘦不禁

春吟

一春吟未穩今日再吟看石井桐花晚江城穀雨寒白
烟浮野寺蒼蘚繡池欄為謝松梢鶴官卑去住難

寄題王次點東巖

生事付妻兒山居清可知自言雪收後不夢客遊時洗
石鐫唐帖凭松讀楚詞却愁登第去草沒菊花籬

桂

一夜桂花發千崖風露香樹經秋幾過人在月中央不

預離騷賦空居寂寞鄉山翁對之飲酒色也鵝黃

送李寅歸里

憐君竟不耦每事與心違南雪歲將暮西江航獨歸停
薪待官米借宅共僧扉吾老嫌為吏相煩尋釣磯

送趙正甫丞湘陰

行舟何所有新酒滿甌瓶若使三閭飲終應一念醒官
卑掌苗籍吟苦掩松廳清夢如湘水遙通春草亭

酬諸友喜歸之作

却歸思去日十過草池春新雪滿雙鬢故交餘幾人藏
書蟬獨飽借宅鶴同貧夜起吟芳什涼風吹桂輪

送劉成道旅遊

從軍不願賞歸補萬松栽獨作漁樵計安知婚嫁催江
船深夜月山驛小春梅老境詩閒淡孤吟薦一杯

漁父

衡嶽早來雨湘江增綠波小舟浮似屋香草結為蓑水
定見魚影夜清聞櫓歌悠悠百年內醒少醉時多

初夏倚春望六祖寺

柳絮兼花片舞風湘水濱濃嵐如細雨初夏是殘春鳥
度山家曲泉清佛界塵年衰眠易醒歸夢不能真

聞趙昌甫赴召

甘得眠雲復飲冰此翁不獨擅詩名山深難避蒲輪召
陞遠聽扶藜杖行老去報君心轉切年來守局夢頻驚
有時湖上看垂釣只憶磻溪溪水清

題劉荆山母墓

綠草盤髮白露晞老樵能記虎眠時石函深貯懸鍾識
翠壁新刊斷織碑隴勢三分松檜色泉聲千古夢我悲
珪郎向日升堂友留宿雲庵撰誄辭

陸侍右得祠歸里往餞弗及寄以是詩

三以囊封入紫微一星今夜出郎閑賈誼幸無湘水謫
知章乞得鏡湖歸乘潮不等詩人別望闕恨憂諫者稀
笠澤門前古松下他時容我借漁磯

弔盧玉堂

金鑾坡上文星落收拾遺文有幾函
草制空教生白髮
蓋棺只是着青衫
吟魂夜訪林逋塚
破屋寒拋謝客巖
自有舊家椽筆在
豐碑豎起壓松杉

弔蔣弋陽

悲風急雨柳塘寒
卮酒篇詩哭肖韓
長記湖西訪梅日
獨於船上取琴彈
弋陽百姓私營廟
紫府無人別擬官
墓隴從教長新草
雙鳧何處只空棺

送蔣大璞赴揚州司戶

維揚幕府最風流何掾梅開蔣掾遊新籍楚民今幾戶
舊年隨帝此停舟慈親就養惟愁雪元帥崇詩不畏秋
壕澗城高豈忘戰平山堂北是神州

縱遊

人事元知不可諧名山踏破幾青鞋百錢掛杖無時醉
一鐻隨身到處埋驛壁讀詩摩病眼僧窓看竹散幽懷
亦知詩料無窮盡燈火蕭疎過縣街

西湖重午作

高誦招魂招屈平只應沉恨隔浮萍著騷直以尸為諫
亡楚如何醉不醒像虎空懸青艾束辟兵難望綵絲靈
憑君一激沅湘水淨洗中原血鎧腥

奉歸柳塘潘希白詩藁

織柳縫花雅道衰將題錦卷復敲推夜寒吟苦水漸合
境寂心融造化來斲石崑崙攜玉下乘槎河海到天廻
今時古調何人愛東野長江在夜臺

王道士惠柳檣

千年檜出寒巖
罅掘得根來比金價
髣髴山陰見此株
尋思却是闕全畫

欽定四庫全書

江湖後集卷八

宋 陳起 撰

趙庚夫

庚夫字仲白莆田人寓居興化軍魏王八世孫
兩舉春官不第以宗子取應得右選趙紫芝名
冠四靈而仲白亞於紫芝陳振孫書錄解題云
劉後村誌其墓擇其詩百篇為山中小集屬趙
南塘序而傳之

寄題孔道士雲庵

道人居玉笥手闢小蓬萊門寂山相對庵空雲自來
茶煙朝宛轉丹氣夜昭回欲助梨花夢攜鋤獨種梅

宿花果園

緣無耕種地役此老來身下馬看題壁聞雞起抱薪
縣荒齋米過店好啜茶頻僕也師夫子宜為南北人

遊山歸賦

山光海影一微塵歸到庵中認得真對境直須心有眼

參禪除是膽通身隱無高論姑隨性貧亦常談莫語人
生死看來非大事世間何說更尖新

宿秀才嶺下

雨急寒城墊角巾家家門掩不逢人
遠看草樹疑成雪忽見楊花憶是春
複嶺征夫松作蓋深村客舍石為隣
清人神思明朝起半月行程溪水濱

讀曾文清公集

茶山八十二癯仙千首新詩手自編
吟到瘴煙因避寇

貴登從索只棲禪新如月出初三夜澹比湯煎第一泉
咄咄逼人門弟子劍南已見祖燈傳

鬢髭

鬢髭漸漸長霜莖老聽山中鶴唳聲九死得生尤可重
百年幾日更多營自參梵夾機心息專食藜羹胃氣清
檢點依然魔障在草堂釣艇未忘情

落魄

落魄蕉衫戴道冠菖蒲滿案浸清寒有錢即買丹砂煉

無病頻將素問看連日游山僧共往頻年乞米鶴同食
世間不朽非鍾鼎曾與高人靜處看

落魄江湖夢裏尋起來佳處散煩襟長風送雨晚涼甚
獨鴈叫雲秋意深宵次直須冰玉潔鬢邊莫放雪霜侵
清時我是無能者肯作澤間憔悴吟

懶

懶不梳頭髮覆肩飢吟狂嘯傲流年琴無弦索眠為枕
床有蒲團坐當羶夢着絮滾曾見佛閑拈如意想登天

早知移却觀書眼去看廬山瀑布泉

真州聞角

畫角聽時恨最深
戍樓偏在女牆陰
聲寒恐有新霜落
意遠未隨紅日沉
涼月一天孤雁影
秋風萬里壯夫心
連宵只解搜詩思
哀怨何曾動羽林

心字

心字今無一點塵
面毛徑寸垢生鱗
齋時野雀臨薌几
定裏山蜂立葛巾
欲喚羲黃談太古
自疑嵇阮即前身

兒童共指深衣笑問是秦人是晉人

書李長吉集

幾迴掩却又重看吟罷心如著露闌欲上玉樓窺老筆
虬龍擁處雪霜寒

葛起文

起文字君容丹陽人起耕之弟

遊黃山寺

偶為尋幽出扶筇亦懶拈鶴巢依古塔燕語入虛欄筆

下詩初就樽中酒屢添此遊堪喜處膝上一掀髯

詠竹閣

歲寒編竹閣蝸縮度窮年日暴南窗紙風垂北戶簾
爐深全火氣鑪小聚茶煙為索梅花笑微醺步矮簷

窖嶺道中

屨穿蒼蘚滑水複更山重有圃春偏晚無人碓自舂
亂雲生峭壁一鳥沒高峯隨處桃花發仙源似可逢

深院

深院人閑酒淺斟日長簾幕自沉沉梅花可是因春瘦
洗雨梳風太不禁

趙崇蟠

崇蟠字漢宗開封人太宗九世孫嘉定十六年
進士官至大宗丞有白雲小稿

憶昔一首

憶昔城南會珮馬輕春風芳華感人心折贈以為容俯
仰一相失去若南飛鴻青青女蘿衣蔚蔚石上松歲寒

無夕秀安得長相從願為日月光落君懷袖中三五如
循環千里宛可同

題彈臬

彈臬莫彈鶴惜此孤飛翰鶴舉即千里渺在青雲端彈
之固無益瘦不充君盤却恐梧桐枝無復棲鳳鸞

擬人生不滿百

人生不滿百譬如朝露晞白日入虞淵胡不秉燭嬉大
耄嗟晷短多憂亦奚為君看玄廬道輒車無停時伺晨

當及旦佳會當及期

故人

故人西南風遺我一束詩長哦結幽想恍惚若見之游
雲靄層霄聚散安可期虛空聞妙音意重千金貲相思
若行月一夕天之涯閑窗穿夢魂碧草春離離

美人貌如花

美人貌如花獨立古道邊芳年抱幽思豔裔春風前春
風固無情桃李終欲言不剪紅豆枝相思獨懸懸

適趣

賦資在山林適趣非任放乾坤入我牖得此一昭曠雨
露日以深未泰日以長妻兒喜相謂一飽知可望飯蔬
適我願此意應勿爽

反輓歌二首

生人送死人哀哀淚如霰生人閱寒暑冉冉亦如電來
去遞相送展轉不可見丘樊謹封殖陵谷猶有變萬古
長如斯何庸致深辯

死生雖異塗昭晰本一理
崦嵫落圓景一訣非永逝
達人隨元化生死一劇耳
生生常癡冥安知非真死
死當安吾歸生當適吾意

用看雲體

上有懸石崖下有滑石道
中有觀空人容顏半枯槁
坐息窮年歲抱此希世寶
雖然久奇俊塵翳已一掃
或云大道初不剩亦不少
用力勤修為苦辛坐中老
新州有樵人此意極了了

穠華

穠華侈春艷松栢凌霜雪芳時若轉盼萬族畏銷歇人
生金石交所貴在黃髮同衾異寒燠抱蘊應未察貧賤
張與陳利達胡與越安得皎潔心長年似明月

野馬

野馬紛驅馳競此光一隙世事若領髭朝摘暮還出惟
應壯與老冉冉如過客歲寒山上松稍稍見其實

詠竹生花

竹老方作花清氣應自結結實成琅玕中心抱冰雪世人弗肯食欲獻終不屑鳳凰在高岡音響方節節

失題

雲臺會功臣際會若風虎獨有嚴子陵垂竿富春渚相求到幽藐相如有平素吾寢惟吾真君意應勿忤歸來拂苔石整我竿上縷煌煌道義間足以照今古

春日

勾芒暢生意惠風改繁霜日月天清明桃李春輝光庶

情悉萌達衆羽同飛翔乘時各有適皞皞齊康莊山人
感物化欣慚殊未央回視元氣初萬端一微茫我欲觀
其微因之問鴻荒

田家

方春事鋤犁晚節多黍稌雞豚樂豐歲一飽輕萬事少
長情熙熙呼喚相爾汝雖無禮節拘氣象應近古先進
不可期無懷在農圃

一蓮

一蓮瓶中枯一蓮池中子結子心雖苦而猶勝枯死賞
心一日期詎非得生理君看千歲樗荒郊永淪棄

飲少

平生不善飲飲少醉已極恨不如淵明陶陶少虛日桑
磁無停景寸晷足可惜今人與古人展轉不相識孰能
制顏齡擾擾竟何益

白蓮

池上白蓮花秋風洗香雪坐令紅黛皆塵俗一種淒涼

不堪折微波脉脉露光溥姑射仙人步烟月

征婦怨

梧桐葉葉生涼秋燕山早寒已知道則則力力歎不休
堂前月光使人愁停針罷線淚沾裳朔風漸高天雨霜
妾憂欲死幸未死未死猶堪寄衣去

皎皎

皎皎白玉堂有女白於玉門前車馬任西東門裏苔痕
四時綠春風撩亂飛伯勞櫻桃花重紅天天夜深撲落

金剪刀烏龍睡穩蟾蜍高

代贈

雙綰玉釵垂相逢暗斂眉紅潮初上臉未語兩心知羅
韞凌波拂暗塵露桃烟柳不勝春珊瑚枝下重相見曾
是鴛鴦夢裏人

高樓曲

高樓漠漠東風塵花鬚落溪生綠雲艷歌美酒消好春
千金難解青娥顰燕鶯語言鳳凰意畫空不成天似水

潮紅暈臉濃蛾低門前采繁春正遲

進酒行

玉槽夜壓葡萄碧石溜寒泉響凌歷水精壺中激琥珀
醉呼酒星下瑤席小鬟春風花滿頭堂堂一曲真珠喉
六國三朝春江流眼花落井消千愁

難忘曲

弱花低繡檻月滿綠楊津一笑領深意過於三月春樽
前停妙舞堂上設華裯上客不須醉相將夜向晨

幽居

不作無興歎幽居體自胖能貧蔬食足投老敝裘安濁
酒融春意青燈話歲寒外頭無限事忙殺不相干

識得

識得聲牙字三生拙未除閑居兩疏傳餘事二王書老
任衣冠古貧從俎豆疎農人適相告早晚出犁鋤

翠雲寺

杖屨入雲端天空眼力寬地因山氣濕窗帶瀑聲寒隱

几俗氛遠捲簾僧夢殘相逢隱淪者妙語亦翻瀾

漢地

漢地文書密窮邊歲月深但高蘇武節不察李陵心過
鴈西風急荒臺朔氣沉同生不同恨萬里一露襟

地僻

地僻逢迎少吾生信杳冥清談養生論兀坐太玄經性
拙貧逾樂神清夢數靈亭亭歲寒友相對眼終青

咫尺

咫尺越山海其如千里何祇應憐命薄不道賦情多墜
綰交枝玉纖圍百疊羅清宵無限思枕席起微波

臘月

臘月二十五人家被舊年山人無可禱睡着不知天

窗前

窗前尋丈地種得一株梅明月清風我紅塵不復來

失題

白玉誰家郎紅粉何處女秀色總堪憐春風密相許

幽意

開簾野水聲倚杖青山色幽意在人間人間不相識

春朝偶書

一夕春歸桃李根清寒猶勒艷陽魂雪霜雨露年年事
惟有梅花地位尊

淮河水

秋風淮水白滄茫中有英雄淚幾行流到海門流不去
會隨潮汐過錢塘

天寶禁中

外庭班退壽王歸別有騎兒侍禁闈解事老奴寧及遠
君恩如許政忘機

廣寒宮

碧海沉沉桂殿幽滿天風露四時秋寒宮白兔參差老
一種淒涼各自愁

臨汝道中

野水平田稻正青肩輿軋軋趁新晴
擎頭奴子無拘束

牛背醉眠歌太平

送還吳山藁

萬卷文書一幅巾不將風鑑落埃塵
桂花未綠槐花謝獨佩江蘺有幾人

移梅

鄰家爭乞麗春栽玉手輕分帶月培
窗下老翁迂入骨清齋三日為移梅

癡猫

愛汝編欄任汝癡了無殺意上鬚眉通宵鼠子喧人睡
政爾相忘也大奇

醉起

醉起西窗日欲斜新煙初試雨前茶川原春意無聊賴
開盡桐花到枊花

幽齋

幽齋宜清復宜溫高卧騰騰百不聞贏得神安無夢事
從教黃葉夜紛紛

大廷

大廷新革晉春秋王氣寧知在荻州
泉下髯參心獨快
不教司馬恨枋頭

有感

舞罷歌停歲月深當時勝蹟盡銷沉
飛雲捲雨人爭賞
留得佳名尚到今

倚樓

平楚連天獨倚樓
樓頭日日望行舟
相思飛盡梅花雪

江上晴雲片片愁

田家

雞豚白酒樂豐年飽即高眠不問天
少長有恩相爾汝
淳風應似伏羲前

西施捧心圖詩

吳苑風光越水春兩山眉裏笑顰分
腹心別有堪憂處
狂殺君王藐不聞

晚立

古徑苔深畫掩關
外頭塵土不曾閑
雨晴天氣明如鏡
靜倚孤松看遠山

獨立

片雲收雨入西山
望極蒼茫杳靄間
蕩蕩太虛無一事
祇應日月不曾閑

譙樓

霜滿譙樓報五更
道人睡穩幾曾聽
金街應有朝天客
珮馬禁寒望曉星

小窗

小窗風定曲肱眠
骨冷魂清夢易圓
蝴蝶不飛花自落
海棠枝下月娟娟

小窗對客

紙帳梅花自一真
小窗對語坐無裋
詩家供給惟風月
病與詩疎始覺貧

清平樂

樂府新聲替舊歌
沉香亭北醉顏酡
牡丹謝後生秋草

一曲霓裳已覺多

如夢令

日日酒圍花陣畫閣紅樓相近殘月醉歸未長是雨羞
雲困低問低問獨自繡幃睡穩

窗外燕嬌鶯妬窗下夢魂無據夢好却頻驚不到綵雲
深處無緒無緒紅重一簾花雨

更漏子

玉搔頭金約臂嬌重不勝殘醉留淺黛暈顰脂淺寒生

玉肌 待歸來渾未準疑殺那回書信春又好思無窮
捲簾花露濃

謁金門

春尚淺江上柳梢風軟銷盡玉梅春不管冷香和夢遠
脉脉綠窗新怨花勝無心重剪簾押護香閑不捲捲
簾芳事偏

春意泄香重一枝梅雪寒透玉壺冰暗結玉奴情更劣
似語還羞奇絕妬白憐紅時節酒力未醒雙眼禰一

簾風弄月

晴意早簾外數聲啼鳥有約不來春夢香鎖窗微弄曉
江上殘梅未掃葉底芳桃紅小天遠斷雲塵不到過春
還草草

春意薄江上晚來風惡簾外海棠花半落睡深渾未覺
夢想當年行樂新恨暗添金鵲寫就錦牋無處託去
鴻天一角

清平樂

懷人

鶯歌蝶舞池館春多處滿架花雲留不住散作一川香
雨相思夜夜情悰青衫淚滿啼紅料想故園桃李也
應怨月愁風

妬紅欺綠輕浪潮溫玉鸞袖捲香金粟款嬌怯未消寒
粟錦衾初罷承歡宿粧微褪香彎醉眼乍鬆還困斷
雲猶遶巫山

南柯子

小姝

絲髮風輕掠酥胸冷不侵背人小立却瑤簪一縷柔情
繫得幾人心 曲檻花方落河橋柳未陰紅羞綠困不
能禁惱亂東風無計等春深

掩笑輕擡袖慵粧淺畫眉嫩晴簾箔玉梅飛門外寒輕
疎柳起黃時 綰帶香羅結交釵綠玉枝看看又誤踏
青期倚徧欄干心事只春知

浣溪沙

望海潮泛舟

輕雲過雨炎暉初減樓頭片片餘霞曲徑通幽小欄斜
護水天薄暮人家暝色趣歸鴉竹風交立玉清透窗紗
斷岸連漪亂萍芳葦遶煙沙依稀畫艇蓮娃掩鮫綃
微沁急漿咿啞香霧霏微冷光搖曳姪紅深映低花天
際玉鉤斜磯邊菱唱荅驚斷鳴蛙滿棹白蘋歸去幽興
遶天涯

沁園春

金匱要略卷八
紫陌芳塵煙縷收寒雨絲過雲羨交陰桃葉窗前曲檻
認巢燕子柳底朱門回首年時霧鬢風袖裊裊娉婷
上春逢迎處儘芳華繾綣玉佩慙慙誰知此際銷魂
漫隱約人前笑語溫記掌中纖細真成一夢花時怨憶
應為雙文載酒心情教眉詩句空悔風流曾誤人憑誰
去待寄將恨事兩處平分

摸魚兒

捲珠簾幾番花信輕寒猶自成陣一年芳事如朝夢客

易綠深紅褪寒食近惟自有斷腸垂柳禁春困
瑣窗深靜悄疊損縷衣凝塵暗掩金斗熨清潤
章臺恨準擬芳期未穩舊遊細把重忖鑑鸞釵
鳳平分久留取年時心印誰與問待試寫花牋
密寄教郎認妬香憐粉欲寫却還羞輕顰淺歎
字字攪方寸

張渠

渠字方叔南徐人

贊崇禧文室二僊圖

鹿皮櫺葉容顏枯槁青巾白袍飄然氣貌不同者形所
同者道金丹一丸天地同老

敬餞劉興伯提幹之官

平生子劉子勁氣橫秋霜不肯作短簿海濤駕飛航稜
嶒高頰顴碧眼鬚眉蒼鶯花風月夜錦繡傾肝腸諸公
盍推轂置之白玉堂篋庫著此士四海空茫茫僕也客
於淞雲阡淒故鄉退鷁豈坦率瞽無預文章乘除君晚
泰尚欲思激昂年饑僅半菽羞澁無酒漿贖別祇此詩

君無誚淒涼

登鍾山

登高得勝遊暫喜塵鞅脫林深鳥聲微石兀馬足滑一
笑立高寒雙明渺遐闊酒酣百慮消世事等毫末

送姚提幹行

虛齋鎮東鄣從之南容君我初未之識邕翰傾殷勤脩
潔以博習秀美而有文玉犀映秋水英辭湧春雲雞距
角魯蜀昂然鶴非羣晤言到聖處商也樂所聞最喜直

而義壯音駭鼓鼗告子少於孟先策養氣勗牛山木信
美謹勿容斧斤助苗固得槁可使稗不耘觀于所植立
真能張吾軍仁義可效治淵源在河汾詩書自師友芝
蘭足膏薰剛風接勁翮去去翔霄旻清時有聞者必也
吾子云

賦山水雪景

寒雲凝不飛回風舞霏雪移多山凹平漸釋澗聲咽饑
鳥噤無語老樹僵欲折薄暮漁舟歸行人稍稀絕詩翁

酒力微清興渺天末夜深有奇事玉樓耿寒月

約臺府同官王元敬以次七人登巾山以前峯
月照半江水分韻得半字

一江貫萬山雙塔抵層漢我來躡勝遊寒日已過半夕
陽滿孤村潮勢吞兩岸俯視塵世微雲邊數聲鴈

題三茅峯

巨靈握奇石飛落人間世怒拳一擊破高下成鼎峙三
光發其精五岳借之氣精氣久以靈稍稍見奇異香之

為草木清之為泉水天則為洞天地則為福地嶽嶽白
雲根怪巧分鎖細龍潛而虎藏猿啼而鶴唳始焉三僊
居終也衆真萃至今丹砂光上下數萬里清遊動高吟
今古幾騷士搜竒探幽深或僅見一二輸君呼筆神盡
發萬古秘我于塵埃中讀之如親履呼兒謹謦藏再拜
歸棐几

次韻孟師翰鳳兒花滴滴金

彩鳳與幽花動植自形色命名取肖似造化何容力丹

穴呈九苞夜夢或吐白未若秋中芳榮悴了無迹
物理紛以移血或化為碧安知秋草英不作金點滴非
繇冶者鑄芳葩自光澤誤彼市中攫一過一目逆

有懷尤贊府李崱

西風約暮雨虛亭得新爽忽焉見峻嶒彷彿呈萬象誰
其伴孤吟寒蛩軋幽響碧雲渺佳人抱膝注遐想

題劉直孺拙逸軒

營營天壤間孰不為智使有美山中君獨與世俗異一

真不鑿若大愚四體安然如止水人皆喜君得佳扁我
於其間有餘議一陰一陽分動靜江河山嶽判流峙造
化而欲辭其勞造化之功亦息矣伊周孔孟心乎民老
氏莊蒙忘此世使四君子俱恣然萬古滔滔孰經濟以
拙而望巧巧未及成拙先至晦巧而為拙終焉多與巧
相值逸者自逸勞者勞天之降材爾殊爾君才足以應
萬殊袖手山林恐非計願君畢力運天巧却換軒名與
張子

為茅峯崇禧主人景架巖贊王肖岩所寫喜容
虬髯如雲眼如月宵次毫端一泓雪政恐儒冠或誤身
尚友虛無老莊列松陰泉影綠悠悠此時此意如何說
三真跨鶴夜相從長嘯一聲山谷裂

贈雲竹一老琴師歌

昌黎不作穎師已千古風流隨逝水大音祇在天壤間
雲竹翁能發其秘明之為侯王幽之為神鬼悟翁一轉
指頭禪萬事泯然心耳廢澗泉漸瀝走宮商仙佩丁當

分角徵數聲急羽來秋空夜半西風掠蛩砌諸公不但
知此音真欲釣深得其藝大篇小什分珠璣往往不惜
兼金餽吾聞南風之歌下舜廊四海熙熙樂平治願翁
持此天上頭一鼓解民愠再鼓阜民財勿作區區自豐
計

題錢則父凜對軒軒有老檜奇甚

老紅落盡蒼苔院萬物隨時自流轉蒼然古檜夜窗前
獨抱寒姿聳孤幹幽人丈室空無埃風聲月影共徘徊

樹兮人兮兩清絕不然君肯居此哉

題金淵綠淨亭

憑高四望天沉沉平蕪遠樹橫夕陰碧雲吐吞獻奇象
迺知造物得我心漁舟兩兩疊烟棹白鳥出沒滄波深
悠然呼酒納幽致須臾寒月照古琴

第一峯詩

原注顛倒
一七體

穿雲踏月登茅嶺一陣西風吹客衣松儼立兮如伏山
週迴兮若幃竹泉清可鑒苔石坐忘歸鶴唳空靄猿啼

翠微白露下碧烟飛適意忘機歔歔

淒清露重月明紗帽濕袂衣輕路險僕倦石危馬驚近
市火數點出林鍾一聲客子征鞍暫解仙家雲關未扃
濁酒三杯投倦榻夢回畫被寫吟情

雪後呈邵堯章權尉

刮地風成陣漫空雪作團侵陵詩骨瘦開拓酒腸寬
竹寒聲細絨梅冷艷乾長官何太喜農事正相干

半年

半年留鶴邑歲晚倦重游雪柳帶春意煙蕪生暮愁怕
看新鳳歷忍拂舊貂裘莫道知心少相親有白鷗

華亭道間

移船過九曲滿袖貯西風木落山容老荷枯水面空客
懷詩句裏時事酒杯中莫聽雲間鶴寧呼天外鴻

題雲間皎上人局綠軒

藂竹傍幽亭蕭然一畫屏色欺春酒碧光映夜燈青雨
葉供香潤風枝搖夢醒却嫌千畝闊浩渺綠難扃

題黃岩黃山樓

樓俯澄江碧山宜四面觀壓波橋影闊帶雨櫓聲寒客
夢因詩醒歸心得酒寬虛懷納幽致濕翠撲欄干

相公新創雲山觀於州治之東詩以頌之

華榱勝槩實相兼却笑滕王詫棟簾海內一雲高出岫
江南列嶂杳平簷作霖錫命宜爰立維石興歌正具瞻
寰宇固應同德宇共期羹鼎試梅鹽

帝城

帝城那得見秋容
秋在三吳澤國中
蘆未著霜花已白
蓼宜近水影偏紅
一行落鴈低南浦
萬點棲鴉起北風
安得畫師模此景
釣魚磯上着詩翁

半年再作華亭客
每喜輕帆得順風
白水涵秋千頃淨
清霜粲曉萬山空
暫時放浪如塵外
憶昨經過似夢中
濁酒三盃眠未熟
不能平處枕邊鴻

次韻金陵趙民曹

原注與裝

水閣即事

尚想溪亭跨鴨頭
市囂到曉不曾休
角聲吹斷老梅月

橋影壓翻寒葦秋三語固知非昔比十年不到使人愁
老來著脚茆峯下相望何殊風馬牛

再用韻呈相公

等圓乾坤造化中此花珍重殿春紅矜持不受荼蘼月
披拂正須楊柳風三詠品題真入妙獨慚屬和未能工
廳前舊本今應在何必移根江以東

和澄齋劉制幹過蕪湖渭陽宅有感韻

興言陟屺駐征艎丘水依然亦故鄉萱草夢寒詩思遠

梅花月冷角聲長暫辭小隱從三聘況值清時已一陽
朝籍漸通恩數洽會看梧櫟發幽光

留別耘業林逢吉飯牛翁鄭簡子

天台山下兩詩仙剪霧裁冰五十年耘業三間千古意
飯牛數集幾人傳半江明月曾同賦一段清風豈偶然
匹馬衝寒西驛路碧雲冉冉思綿綿

奉和魏提幹

騎鶴樓前奏宓琴竭來又作海山吟碧雲不隔鄉關夢

白髮能灰客子心愧我抗塵徒走俗羨君博古更通今
新詩清響傳空谷擊節長歌到夜深

登蘇臺用秦憲韻贈兩趙提幹

原注汝
積幼聞

勝賞多從暇日違眼中朋友欲星稀退休不復思三顧
能賦猶堪廣七依遊鹿臺前空逝水栖烏曲裏只斜暉
書生懷古真癡絕看盡閑雲入棟飛

窗上

窗上月朦朧香芸鼻觀通了無梅竹影猛省在舟中

題啄蜂雀井團雀二圖

游蜂從何來，饑雀巧相遇。誰其釋紛拏，放汝採花去。
日暮投荒榛，叨利腹良餒。爾竟何所爭，固結不可解。

鴈聲

鴈聲恰值到江東，霜影空濛落晚篷。寒著蘆花禁不得，
一層晴雪亂西風。

春吟四絕

岸草不知綠底綠，山花試問為誰紅。元造本來惟寂寞，

年年多事是春風

沙渚清冷薄葉水野亭和暖杏花風此中佳趣無人會
牛背斜陽卧牧童

花露半乾紅入戶竹風微動綠侵床翠屏殘夢不知處
幽鳥數聲春日長

香鼎灰寒午夢回閒情誰與夢徘徊杖藜信步穿幽徑
一陣野芳何處來

送賓書記自揚歸吳門

一葉黃蘆渡渺茫
誤隨野鶴上維揚
角聲吹斷梅花夢
依舊楓灣半葉霜

聞杜鵑

流落江南帝魄癡
年年啼到綠陰肥
蜀山邈在青天外
只勸人歸不自歸

勸農二絕

善端天賦本無殊
力穡之餘好讀書
莫訝勸農因勸學
須知公相起犁鋤

長官誨汝亦諄諄須信民生總在勤試誦殷盤幽七月
詩書即是勸農文

題包虎

正眎眈眈怒作威西風搖毒上牙鬚山翁祇作丹青看
馮婦從教自下車

日日紅林飽血腴尚將餘力咬枯株高亭素壁黃昏後
疑有悲風落坐隅

咏十月桃

原注夢中得一樹春風
怨落暉之句覺而足成

十月桃開三四枝
淒涼時候見芳菲
小紅不著黃花蝶
一樹春風怨落暉

騎鶴仙

擁麾猶願富腰錢
千古相傳跨鶴仙
莫笑昔人空覬望
後來人欲更熏天

題稅軒新築送青亭四首

花木中間着小亭
簷虛不礙兩峯青
數聲啼鳥闌中過
不似家山子細聽

日抱吟情到此亭捲簾孤坐看雲生詩懷恰與雲相似
一點悠然度太清

白雲盡處青山小紅雨飛時綠樹新佳致仗誰同管領
野禽啁哳話深春

日移花影上疎簾香鼎燒殘逐旋添春事已隨詩入夢
一庭芳草綠纖纖

題趙子固水仙圖

紫府川妃夜宴還玉盤金椀落人間香肌不受緇塵污

依約風前響珮環

秦淮


往在秦淮問六朝江樓只有女吹簫
昭陽太極無行路
歲歲鵝黃上柳條

至後二日登狼峯

江流不盡天連地山意無窮春復秋
多少詩人無分到
我來三月得重遊

聞春禽

萬疊雲山擁翠屏
筍輿終日面山行
幽禽上下好音語
到底不知誰命名



江湖後集卷八

欽定四庫全書

集部

江湖後集卷九

詳校官庶吉士臣朱理

助教臣常循覆勘

謄錄監生臣卞爾巖

謄錄貢生臣吳士英

欽定四庫全書

江湖後集卷九

宋 陳起 撰

姚寬

寬字令威，陳人。按文獻通考載西溪居士集五

卷，陳氏曰：姚寬撰寬待制舜明廷輝之子，宏字

令聲，之弟，為工部監門金人來侵，寬言木德所

照必無虞，言驗。將除郎，召對得疾，仆殿上卒。

捉搦歌

雙蝶護花飛
老女怨春暮
撲蝶金粉銷
折花顏色故
中聲唧唧雨
泣至天曙
問婆許嫁女
莫要擇門戶
願得不單棲
任他流浪去

少年行

少年白鼻騮
玉勒錦連羈
徑就胡姬飲
熟醉當壚眠
剝絲入蠶繭
郎意在纏綿

江南新體

悠悠復悠悠
日夜瀟湘流
瀟湘春草生
行人向南愁
緩

歌竹枝娘窈窕蘋花洲

江南無春秋花草紅復綠
燕燕撇波飛雁雁依雲宿
遊子去不歸淒涼採菱曲

劉生

劉生古豪俠意氣無與俱
隱若一敵國不顧千金軀
擊劍探赤丸投瓊叱泉盧
醉使新豐酒笑擁西京姝

宿諸暨大雄寺

解榻無凝塵雲房愜幽素
清寒薄衾枕微涼散庭戶
夢

破流水聲鉤簾捲山霧時與靜者俱為擬湯休句

望行人

戍客久不歸生死關山道出塞入塞雲長亭短亭草夢
斷玉堦人愁深花欲老庭樹起秋風寄衣當及早

昭君曲

石崇云昔公主嫁烏孫令琵琶馬上作樂以
慰其道路之思送昭君亦然非昭君自彈琵
琶也昭君恨帝始不見遇席上請行單于得

昭君大喜獻白璧一雙駿馬數疋而已昭君
留北地作怨思之歌傳於漢後為此辭者多
遺其事實

漢宮深鎖千蛾眉妬寵爭妍君不知昭君自恃色殊衆
畫師忍為黃金欺當時望幸君不顧淚濕花枝怨無主
一朝按圖聘絕域慷慨尊前為君去蕭蕭車騎如流水
慘澹風沙千萬里昔年公主嫁烏孫妾身況是良家子
自嗟薄命無歸路弱質安能事強主可憐宮錦換氍毹

忍變故音作新語馬上琵琶送將遠行路聞之亦淒斷
寄書空憶鴈南飛只有怨歌傳入漢漢家失計何所獲
羽林射士空頭白白壁駿馬無時無傾國傾城難再得

西湖醉歸作

湧金門外看春色水流不盡花枝碧一番洗雨一番風
墮蘂零紅收不得蜜房羽客尋芳歇蝶翅粉盡金翠滅
雲昏草暖天亦迷日暮楊花散成雪傾城一醉爭狂蕩
踏歌相携大堤上湘妃有意解明璫桃葉竟誰迎兩漿

東君無情背人去脉脉那由話裏素歸來簾幕護殘燈
一夢閑堦月如霧

搏雞行

大雞角角號秋田小雞啾啾隨後先喧鳴得意啄遺黍
四顧無人驚復聚青天閃倏片影落飢鷲搏取填空嗟
紛紛散亂入荆棘老父鴈門叫無力鷲飛突去何道疾
大雞還呼小雞出

西溪早行

清晨出故溪鄰曲未聞雞草露平平濕溪雲漠漠低轉
山人忽見分路馬多迷作客風埃裏難堪聽鼓輦

天台夜雨

瘴海遠黏天山城入暝煙春潮生蛤蜊夜雨長蝸涎燈
几花時落風簾客未眠平生懷此地今夕意茫然

夜坐懷歸簡報恩振老

冷燭翠光殘疎梅雪影寒客心春鴈急詩思暮江寬髣
髴連環夢淒涼錦瑟彈明朝山下寺窓竹間平安

春暮送碧雲閣黎歸靈巖

歸意太怱怱，逢春去住中。
澹香花濕雨，薄影絮行風。
覓句愁何許，談玄興未窮。
應緣知有處，祇莫恨飄蓬。

宿多福寺

蕭寺虛庭夜氣嘉，微風入樹碧交加。
露荷滴瀝珠無翳，月桂扶疎壁有瑕。
欲採蘋花歸已晚，擬尋竹葉夢還賒。
愁來剩有淒涼意，織女銀河又復斜。

釣魚

自小弄絲來驚多去復回沙頭晚風起波上夕陽開

春晴

風雨惜春殘新晴為啟關白雲歸去盡還我舊青山

真戒僧首房晝寢

薄薄簾櫳日陰陰殿閣風無人驚午夢雙蝶下花叢

羅椅

椅字子遠廬陵人饒雙峯高弟寶祐四年登第
以秉義郎為江陵教授改潭州及宰贛之信豐

遷提轄推貨有澗谷集東南紀聞云椅以江南
革命歸隱故鄉廬陵大儒也

秋日雜興

秋山何言哉萬物興自闌昔翳春空雲今作道上斑况
此江浦蕙幾何不為管幽泉大自在映月瀉潺湲
跳魚甚微細解展秋江漪一靜未滿刻一動輒移時宜
由魚樂乎或是水性之商量未渠穩風急蘆花低

白蓮花

白鸞仙人按羽衣曲中弄影江南漪江妃閉置未許歸
一把青寒縈玉絲玉絲蟬連不禁折折着透根仍透葉
風流極處絕成愁君不見婕妤手中團圓似明月

江石

勢橫截江虎踞足白龜却行馮夷哭大川當前波汙汙
石也於此受命獨水石擊撞無了時因危見節難見奇
世間大有胡廣輩欠讀澗民江石詩

溪南春曉

行逢二三月春映掌中盃綠久山猶淺花寒雨未開誰
能奈愁得判不上樓來更莫看雲坐瀟湘有鴈回

冷泉亭

老木碧毵毵幽亭著兩三山飛劣到地空處遂為巖古
塔開蒼蘚清泉滴暮嵐遊人莫來此渠正試春衫

寄答楷姪

時秋四壁冷片紙百回看字古微侵隸吟清不到寒人
生快意有天下好詩難澗水光如月吾琴爾去彈

題方武成詩卷

斯人懷妙質事事合唐賢
命短於長吉吟清似閬仙
寒鴉政鳴噪獨鶴已踟躕
落日山亭下沉思一愴然

寄危驪塘贈以古鑑

百尺樓頭山雨長夢提白髮濯滄浪
從渠金帶花成簇何處魚羹飯不香
語妙囊中了今古騷成肘後繫瀟湘
山寒歲晚蘭苗盛欲當已茅獻草堂

澗底春冰偶不融風前凝作水精宮
古人心事如此鑑

今代眼明惟有公落月還應照太白秋江只合瞰涪翁
送君去貌驪塘影影見踈梅颭晚風

謝南劔黃史君贈松紋劔

使君袖裏玉淵虬曾截蠻江江上流海立山搖三尺外
風盲雨怪一時休民元不許佩牛犢客政何妨彈蒺藜
遮莫塵清便回使青山猶赦郅支頭

題圓覺寺小軒

禪子安排定不癡數拳石映半泓池巖如大石元生就

水似人心未動時二月春深梅不覺五更風起檜先知
青林野寺西湖路直得先生一首詩

遠遊

因夢吳雲賦遠遊江花扶柁水悠悠半輪月散千山影
一葉舟勝萬斛愁天氣漸於寒食近春風只到牡丹休
水程孤冷難為夜起吸滄江當拍浮

題向伯僑吳松雪霽圖

暖來日曬冰滑恨極天寒竹脩雲開梵鐸相訴水活漁

船自流

天上清流雪片人間名勝吳松兩賢相厄窘甚賴有斜
陽半峰

天隨漫解理艇不慣雪後霜前幸自竹篙閑著拋來借
與隣船

林昉

昉字旦翁三山人

訪隱者

曉入南山路松風最好聽
侯扉黃犬睡尋食老鴉靈童
子炊方熟先生醉未醒
借來一榻坐看盡相牛經

秋戍

軍頭夜點名新戍起秋程
月色黃弓甲風沙黑渭城斷
笳清淚滿落葉此生輕
努力供王事歸來享太平

老樹

元是誰人種枯殘此礪東
半身虛映水一葉尚搖風
着雨禽初散當暄蟻欲空
年時濃綠影何處夕陽中

同鄭魯望聽杜鵑

每到桃花發山鵑叫得頻今年同聽處吳下未歸人客
淚滴殘月物情愁暮春胥江有清水聊與濯衣塵

山中

衡門客去嬾冠巾盡日看山自在身飲澗猿來驚照影
泊枝禽起近衡人黑雲欲雨易成晚紅葉如花不當春
卻憶東門牽犬恨當年何似布衣貧

泊越浦

老樹津亭纜客舟
芙蓉蕖香歇
蓼花抽越山
只作古時翠
胥水半隨人事流
別港鴈聲天有月
斷橋漁火夜分秋
翻然自笑芒屨脚
十載風波走幾州

春歸

南北春歸有許忙
一晴輕策度林塘
柳搖別岸東風瘦
花落斷橋流水香
老去客游空劒氣
日來心事只詩囊
幽情一點雲天遠
獨鳥無聲飛夕陽

贈別

傍橋買得小溪船，略舉離盃去意懸。
一水夕陽紅蕩影，數峯晴樹碧生烟。
秋聲不斷雲間鴈，別恨空長柳外蟬。
後夜他州看明月，定知相憶未成眠。

贈張高士

短髮蓬蓬戴小冠，客來歡喜愛供看。
鶴孫夜養翎猶濕，童子南歸語尚蠻。
擊磬花邊禽醒悟，持經窓下竹平安。
自言薄有耕桑地，無事干人不出山。

登龍山塔寺

吳越夕陽多遠山塔樓高處九秋寒江豚吹浪腥風濕
野鳥行空翥雪乾白日潮聲僧老盡黃埃世路客游難
海門航散孤雲落酒醒不堪深倚欄

春曉

薄衣初試曉寒輕雲閣殘陰雨弄晴落去好花微有恨
生來野草半無名丹心愛國勞難破白髮欺人鑷又生
瘦遠石欄三十匝綠楊何處脆鶯聲

題所寓壁

鹿羣上遙岑雲影抵蒼壁無客來敲門倚松讀周易

南屏山畫猿

古木懸藤臂半鈎何年影落北山秋三聲遠憶巴江月
夜半孤舟起客愁

山中春曉

婆餅焦啼曉戶開冷東風裏惜殘梅片雲祗傍簷頭宿
昨夜何山作雨來

雨中過周氏山莊

吠犬柴門扣未開
滿身風雨立蒼苔
禽一箇高枝上
啄得殘桃落地來

戴埴

埴里居未詳詩多仿月蝕雪車之作非拘拘四
靈者也

和王教暮春出遊

矯矯雪霜心孤貞受命獨留滯
染緇塵垢面不饋沐背
城借一戰填塹輸前瀆
葵心向朝陽晞光不能燠
徒置

終無言驅馳惟僕僕豈無豐水滋永嗟非佳穀呼爾授
芻秣羈紲繫駒憤堪羨我良朋林桂賸芳馥博覽繹故
書胸中三萬軸悠然西河上日與英俊逐振鐸揚儒風
函丈紛冠服師友遞響答循誘教匪扑精進日千里目
駭地脉縮顧我闕黨徒無成坐欲速披襟莫奮飛隨羣
被私淑枵然藜覓腸殊未飽公餽彈缺何時歸涎沫流
肌肉遙想烹太牢殷勤羹采菽

原注詩箋采菽所以
芼太牢待君子也

更

當春暮時浴沂衿佩肅心賞弄篇章絕唱清風穆流水

諧朱絃押強破萬竹孝先謾耐嘲橫榻便空腹安識物
外遊幽賞機緣熟矧復有良儔堅久渝晚菊依然蒼筤
叢檀欒旁淇澳

原注補韻淇亦作典荆公押

一絨荷起予明珠得盈

掬大雅久不作疏越鼓凡目臨風挹回瀾淨洗塵翳麴
披閱不停手豈復憚諄復自笑詩思慳企山纔抵麓正
望使南印象馬來天竺競病安能賡振紙空瑟簌絕影
天邊鴻坐困家池驚搜索縱成篇無異蟲蠹木所幸情
不違合并在旦夙願言戒逝糧出晝勿三宿

輦下曲

舊來聞說京師樂香街十里春風箔朝踏金梯入鳳樓
暮下瓊鈎延翠幄蛾綠梅花裝淑質蘭蕙芳笙歌棗下
曲琵琶陌上桑宿醒未解鶯催曉玉珂策馬長安道解
珮遺簪日日歡不覺紅顏醉中老我謂京國皆繁華何
時飛走登雲車誰知著足縑塵底八年飄泊空咨嗟蕭
蕭竹窓風暗度耿耿蘭缸燈自語孤坐逢掖凝清霜獨
卧重衾踏寒雨雲雨陽臺夢不成况欲綺席羅傾城丈

人屋上烏啼夜乾鵲巢中鳩喚晴啼夜夜未央娟娟素
月明喚晴晴未霽寂寂青春深鳩喚烏啼終有侶猶勝
月兔孀居千萬春

電

玄默執徐歲月律中無射京師連雨電小者如彈大者
如拳林柯葉亂下烏鳶折飛翮屋瓦若劃遭擊撲居人
顛沛行道錯愕初疑巨颶掀捲馮夷宮淵珍散墮光閃
爍復疑清霄萬里驅長蛟泣淚盈盈驟飄薄校層水精

碎噴噴珠排滑有識觀天巧一何景象惡嘗聞聖人在上
冬夏無愆伏亭毒二氣不相剝破塊封條已無異祉羽
無勞驗風角今天子握極衡運斗樞景化豫順羣惡蕭
灼精稜胡未孚冰雨墮霄幕其欲霈廣澤胡不為甘霖
沾丐枯焦重甲坼其欲膏土脉胡不為晞薤厭浥瀼瀼
普漸洽其欲表誅伐胡不為皚靄駟見而實草木黃落
其欲弭蟄虫滋生植胡不為嘉平之三白驅蝗入地千
百尺或云水氣專一不解散胡不為長河玉岸之寒冰

可納凌室助頌刷或云陰氣脅陽不相入胡不為氤氲
五色之卿霽叶應豐穰昭帝德此電舒不如雨露慘不如
霜雪結不如冰澌之嚴沍散不如雲霧之葱鬱天非欲
示懲詎用作戲劇漢儒說證應紛紛太不一或賢邪易
位或賦斂苛刻或妻妾失倫或大臣擅法玄道幽且渺
牽附多穿鑿仲尼百世師麟經戒侵逼此變凡在書公
室浸衰削自下陵上曰僭以柔變剛曰剝沸湯湛冷泉
凝寒勝燠熱溫雨受陰氛凌沍自然結時當秋氣杪是

理尤彰灼風起庚庚作今日行西西主殺數至九變金
乃從革大則為兵小刑罰內外靡不以時決天地方會
藏沴候生京洛得非少皞執矩未潔齊得非蓐收為正
有顛錯得非箕伯吞聲不掃除青女護姦不除滅穹昊
赫然奮嚴威重陰膠固紛零落我願聖王覩此攬乾綱
用夬決登俊良屏邪慝陰塵靜掃單于庭陽和徧歛鄒
子律大明威威照九州寒燠時序百穀熟天若雨珠真
可噓請以綴袞冕之十二旒龍旂和鸞之纓絡

彗星

紹定壬辰閏九月己酉之夜彗星出清臺奏御正衙避
席太官減膳蓋瞽宗徹音樂雞竿肆眚出囚繫龍泉責
躬求讜直精誠徹九垓德音走重譯園橋冠帶齏鹽生
筯窺熒熒對以臆臣聞泰素朕形玄黃辨色左旋右轉
一闔一闢來伸往屈四時行除舊布新寒暑易恢恢天
網踈統理廢厥職東方歲星木主仁不掃暴刻尚搥剥
南方熒惑火主禮不掃驕蹇習凌弱西方太白金主義

不掃寇盜生亂畧北方辰星水主智不掃蒙蔽長讒慝
中央填星土主信不掃詐欺滋姦猾皇穹遴選綱紀星
出持彗帚掃環域日華機上有九彗乍上乍下空如筆
歸邪向上有兩彗出也不行見則滅天狗短彗在尾傍
火光炎炎空烜赫天攬類彗雲如斗蚩尤類彗旗後曲
六賊如彗在西方咸漢帶彗居正北驅策舉莫前彗乃
排膠轕不指房心明堂位不臨箕尾后妃宅不抵參昴
詠衾裯不向牛女逐淫佚不訪獄廩至婁胃不詢蓋營

到危室不求社廟上井鬼不好文章遊奎壁不窮天根
越亢氏不咨弋獵來柳畢不從玄枵問虛耗不由張素
丐觴客不自甯觴訪葆旅不入柳倉覓厨食不呼七星
問急事不召南斗共斟酌天王帝廷為大角兩旁三星
如鼎足所柄所指以建時節曰攝提格洒埽庭內萬化
基蕪穢不治孰觀法軫驅風車為宰輔負衡失平在修
飾翼鼓羽翮主蠻夷飛翰不勁必振刷禿帚一加內清
外肅四海九州罔不臣妾帝座中居幹樞機萬年千載

不停息

和陳府教授見贈

遺風洙泗濱汲古酌犧樽魚躍池藻翮鶯呼庭樹喧樂
山不樂水居城猶居村一朝黃鐘鳴九畹滋蘭根

諭鶴文

鶴陽禽也而游於陰一墮矰繳入於樊籠飲啄棲遲無
復介然雅淡之態少焉羈鞫稍縱奮長喙引修吭跳踉
落泊過者驚怒觸罪蹈辱羣鳴如訴予心惻然呼而諭

之曰猛獸搏也拘於檻子其猛而搏者耶鷙鳥攫也繫
於紲子其繫而攫者耶仙姿浮曠而懷清迥觀子之性
泊乎淵靜丹眸含精洪髀舒縞觀子之形繁焉月皎逸
氣出塵幽響警露觀子之心飄飄雲路九臯摩空萬里
竊雲度蓬壺跨崑閬豈不邁往而絕塵哉饑不啄腐鼠
謂在田也渴不飲盜泉謂在野也翮短尾彫混跡鷄羣
鬱鬱拳養壯志未伸又非頡頏烟霞軒翥林汀也結而
脰東而翎羽翼既成青田赤霄非子之故程也耶言猶

未畢群鶴忿悁竦毛勵翼長紆抑之未伸悼哀訴之弗
直皇皇向我若有歌者曰泰予於儲胥之下兮質予於
勺水之陂褰頓悴之弗察兮仍顛頷之莫知紛外侮之
多儻兮懼昭質之纖夷曠一飽之靡安兮矧上征乎崦
嵫噉喉四起悲聲徹天修辭慰藉一語莫宣回視周除
孤雄屹立寂若無聞淡若無識揖而延之化為羽客翩
然馭風九垓瞬息

羣仙賦

原注中伏日壽
宣參政之作

南端熙穆東閣晏清瓊鑾颯纚華芝紛繽踣躑風馭來
自殊庭扣闥請曰鳳鳴朝陽龍翔景雲翼翼國瑞壽矣
卯君余攬德輝以來御扉其撤局闥者辭羣仙曰長羸
阜物朝霽霽霖八荒仁壽六氣平均意有間矣若為啟
明闥者曰今日何日願有謁於大鈞羣仙曰豈曲度房
中聲揚濮上或彈絲吹竹以奉徽音耶曰有是哉豈柳
肢低月蕖艷凌波有若電羽之翁翁者耶曰有是哉豈
齊優戲劇諠浪傾河足資笑噓而徹聽營耶曰有是哉

豈池塘綠淨蓮菱香浮有所謂鼓蘭漿而歌采菱者耶
抑涼臺遠岫竹院碁枰玉壺簷動桃笙波激方羊燕適
爰滌袪暑之襟耶寧風生塵尾扇隔庾塵飄飄羲皇上
人耶聞者不答徐而歌曰九垓昊昊兮無聲八柱臚臚
兮上騰陽道柔兮陰彙征孰網輅是兮伏藏不升羣仙
輒然而笑曰橐籥機絨固運轉不停也耶乃賡而和曰
鉉必玉兮柅必金鼎中寶兮魚弗賓幹造化兮揭乾坤
黃中正位兮玉立千春少焉霞初軒舉環珮鏘鳴仰而

視之惟見卿雲綺錯泰階平實癸未中伏槐府稱壽
之辰也

江湖後集卷九